

Perletakan jawatan Waythamoorthy mendukacitakan – Najib

Astro Awani

14 February, 2014

Oleh [Haider Yutim](#)

KUALA LUMPUR: Perdana Menteri Datuk Seri Najib Tun Razak hari ini menyifatkan perletakkan jawatan P. Waythamoorthy sebagai Timbalan Menteri di Jabatan Perdana Menteri, mendukacitakan.

Najib bagaimanapun berkata beliau menghormati keputusan pemimpin Barisan Bertindak Hak-hak Hindu (HINDRAF) itu dan mengharapkan yang terbaik untuk usaha beliau di masa hadapan.

"P.Waythamoorthy mungkin mempunyai pendekatan yang berbeza, namun beliau sepatutnya berjumpa dan berunding dengan saya terlebih dahulu sebelum mengumumkan perletakan jawatannya," kata Perdana Menteri dalam kenyataan pada Jumaat.

Katanya, Waythamoorthy seharusnya menyesuaikan diri di dalam sistem pentadbiran kerajaan serta menjalin kerjasama bagi mendapatkan konsensus untuk melaksanakan program kerajaan.

Najib juga memaklumkan akan terus melaksanakan program pembangunan sosioekonomi kepada kaum India sebagaimana yang di lakukan kerajaan untuk kaum-kaum lain di Malaysia.

Katanya program-program tersebut adalah selaras dengan pendekatan beliau membentuk kerajaan yang mudah didekati dan sentiasa memberi bantuan kepada mereka yang memerlukan.

Waythamoorthy, yang juga pengerusi HINDRAF pada Isnin telah meletakkan jawatan kabinetnya di Jabatan Perdana Menteri (JPM).

Setiausaha HINDRAF, P Ramesh memaklumkan bahawa surat peletakan jawatan itu diserahkan sendiri kepada Perdana Menteri Najib Razak sekitar jam 5.00 petang.

Katanya dalam surat peletakan jawatan itu, Waythamoorthy telah menjelaskan sebab-sebab kenapa beliau mahu melepaskan jawatannya dalam pentadbiran sekarang.

Perkata tersebut telah dinyatakan oleh Waythamoorthy Sabtu lalu, di mana telah berhasrat akan meletak semua jawatan dalam kerajaan, termasuk Senator.

Menurut Ramesh, Waythamoorthy memutuskan untuk meletak jawatan kerana mendakwa kerajaan Barisan Nasional (BN) gagal mengotakan janji, biarpun menang Pilihan Raya Umum ke-13 tahun lalu.

Source: <http://www.astroawani.com/news/show/perletakan-jawatan-waythamoorthy-mendukacitakan-najib-30117>